



藝  
海  
珠  
塵

14
1627
26



門 14  
號 1627  
卷 26



藝海珠塵

子部小說類

南淮 吳省蘭 泉之輯

介休 范重榮 戟門校

半村野人閑談

姜南篋 南字叔明號蓉塘浙江仁和人明正德己卯科舉人

用刑

周公政書謂刑亂國用重典林少穎曰以其頑昏暴悖不可訓化則殲渠魁威強梗宜以剛克之義也書曰惟敬五刑以成三德此之謂乎高皇初定天下承元大亂之後痛五教之大壞疾四維之不張於是用重典以治

藝海珠塵

半村野人閑談

早稻田大學圖書館  
25.10.30  
藏

之酒有刑膝斷趾鈎背剝皮腰斬坑醢之刑蓋不如是則相沿弊俗染人之深不易驅之於禮義教化之中亦聖人揀偏拯弊之權非衆人所能識者又按宋太宗時光祿寺丞通判彰州錢易上疏乞除非法之刑曰古之肉刑尚以爲虐而絕之近代非法之刑乃或支解齧割勾背烙筋身見白骨而口眼猶動四體分落而呻痛未息臣愚以爲非法之刑非所以助治也臣謂一人愛民民亦愛一人既愛其上則奉上而懼苟以嚴刑欲戒則懼未至而怨已深乞禁非法之刑止從絞斬易吳越王鏐孫弘侗之子也夫宋初懲五季之亂其用重典宜也

至太宗之時亦可以省矣而不省我太祖雖用重典以懲亂至其作祖訓定律令傳之後世則不許用法外之刑蓋因時制宜不得不如是也

### 荅應文章

王忠毅公驥豐功偉烈卓乎一世凡有求詩文者信筆成篇略不經意嘗謂人云北方老實文章不足爲法荅應而已連稟付之此可見公之真誠然公之可傳亦不待此也

### 借親

父母垂死人子於此正哀痛徹骨幾不欲生之時也今

人反以送死爲緩惟以借親爲急父母死未卽入棺仍禁家人輩不得舉哀棄親喪之禮而講合鬻之儀實括髮之戚而修結髮之好雖簪纓詩禮之家亦相率而行恬不爲怪不知作俑者誰耶此東谷所見之言也吾鄉有仕宦於關中者卒于官訃聞其子將借親沈評事子輕以爲不可或笑之以爲不達變通使或人見東谷之言將不暇笑而以評事之言爲從也

體悉人情

宋張忠定公詠視事退後有一廳子熟睡公詰之曰汝家有甚事對曰母久病兄爲客未歸訪之果然公翌日

差場務一名給之且曰吾廳上有敢睡者耶此必心極幽憊使之然耳故憫之李旼張乖崖語錄云

老景

今日殘花昨日開爲思年少坐成呆一頭白髮催將去萬兩黃金買不回有藥駐顏都是妄無繩繫日重堪哀此情莫與兒曹說直待兒曹自老來此姑蘇沈石田啓南之詩也格律雖卑弱然摹寫衰老之景人不能道也

入粟補官

宋晉陽王叔永云納粟補官國初無此天禧元年四月登州牟平縣學究鄭河出粟五千六百石振飢乞補弟

善治政  
異官不從晁迥李維上言乞特從之以勸來者豐稔卽  
止詔補三班借職信承自後援與例以請者皆從之然  
州縣官不許接坐止令庭參國家自正統以來民有納  
馬納粟納草納銀授以散官者至弘治末又有納銀授  
指揮千百戶之例或爲蓄積邊儲拯濟饑饉僅行之以權  
一時之急也然授官者皆令州縣以禮相待而豪民往  
往藉此抗禮長吏不知遜避間有廉能長吏止令庭參  
不延之坐然亦可以據此爲故事以喻之耳

賢相表

唐開元相張公九齡有謝香藥表云捧日月之光寒移

雪海沐雲雨之澤春入花門雕奩或開珠囊暫解蘭薰  
異氣玉潤凝脂藥自天來不假淮王之術香宜風度如  
傳荀令之衣臣材謝中人位參上將疆場效淺山岳恩  
深唯因受遇之多轉覺輕生之速又建中相常公哀有  
謝緋表云臣學愧聚螢才非倚馬典墳未博謬居良史  
之官詞翰不工叨辱侍臣之列唯知待罪敢望殊私銀  
章雪明朱紱霞暎魚須在手虹玉橫腰祇奉寵榮頓忘  
兢惕蜉蝣之羽恐刺國風螻蟻之誠難酬天造捧戴無  
力兢惶存心二表才數語耳曲盡賜予之意三公皆名  
臣可以爲法者故全篇載之以見不以徒多爲貴也

文人蹈襲

文選王簡栖頭陀寺碑文有云層軒延袤上出雲霓飛閣逶迤下臨無地而唐王勃秋日燕滕王閣詩序亦云層臺聳翠上出重霄飛閣流丹下臨無地不唯蹈襲其步驟而雕琢愈甚矣

稼軒不取犯古人諱者

宋辛稼軒棄疾帥長沙士人或愬考試官濫取第十七名春秋卷稼軒察之信然索亞榜春秋卷兩易之啓名則趙鼎也稼軒怒曰佐國元勳忠簡一人胡爲又一趙鼎擲之地次開禮記卷稼軒曰觀其議論必豪傑士也

此不可失啓之乃趙方也觀此則稼軒所存之厚可知矣宜其不肯甘沒於外裔而自拔來歸也其以忠義顯名也宜哉今世之小夫細人僕隸廝養多犯古先哲人之諱在上者恬不之責而使之改焉其亦異乎稼軒矣

謝莊善對

謝莊宋孝武時除侍中孝武嘗賜莊寶劍莊以與豫州刺史魯爽後爽叛帝因宴問劍所在荅曰昔以與魯爽別竊爲陛下杜郵之賜上甚悅當時以爲知言蓋亦巧於應對者也豈至誠之道哉

劉義慶議避仇

劉義慶議避仇

半村野人閑談

何得產

劉義慶宋武帝中弟長沙景王道憐之第二子也帝少弟臨川武烈王道規既薨以義慶嗣元嘉中爲丹陽尹有百姓黃初妻趙殺子婦遇赦應避孫讐義慶議以爲周禮父母之仇避之海外蓋以莫大之寃理不可奪至於骨肉相殘當求之法外禮有過失之宥律無讐祖之文況趙之縱暴本由於酒論心卽實事盡荒耄豈得以荒耄之王母等行路之深讐宜共天同域無虧孝道六年加尚書左僕射所著世說一書先儒多稱之按漢晉六朝有避讐之律此議甚當

蘇東坡勸王安石諫興大獄

蘇子瞻自黃州移汝州未至汝上書自言飢寒有田在常願得居之朝奏夕報可道過金陵見王安石曰大兵大獄漢唐滅亡之兆祖宗以仁厚治天下正欲革此今西方用兵連年不解東南數起大獄公獨無一言以救之乎安石曰二事皆惠卿啓之安石在外安敢言子瞻曰在朝則言在外則不言事君之常禮耳上所持公者非常禮公所以待上者豈可以常禮乎安石厲聲曰安石須說觀東坡大獄大兵之言雖有所激於中然漢唐之禍誠在於此逐君子困生民亦以此敗者宋也公之言可謂有益於國家者矣

智囊

秦檜里子漢晁錯皆號智囊按檜里子秦惠王異母弟且死曰葬我必渭南章臺東後百年當有天子宮夾我墓及漢興長樂宮在其東未央宮在其西若檜里子者真可謂智囊矣貽謀及其身後若台符節得以全其邱隴奇哉智乎而錯也爲國攄智不能保其首領智安在哉

詠荆軻

荆卿欲報燕銜恩棄百年市中傾別酒水上擊離絃七首光陵日長虹氣燭天留言與宋意悲歌非自憐此陳

周弘直詠荆軻詩也函關使不通燕將重深功長虹貫白日易水急寒風壯髮危冠下七首地圖中琴聲不可識遺恨沒秦宮此陳楊縉賦荆軻詩也二詩愴恨之情皆在意外靖節之後此亦佳作也

富鄭公言有所因

宋富鄭公弼奉使契丹謂其主曰北朝與中國通好則人主專其利而臣下無所獲若用兵則利歸臣下而人主任其禍故北朝諸臣爭勸用兵者此皆爲其身謀非國計也愚按此言亦有所因唐高祖遣鄭元璿詣突厥元璿說頡利曰唐與突厥風俗不同突厥雖得唐地不



能居也今虜掠所得皆入國人於可汗何有不如旋師  
復修和好可無跋涉之勞坐受金幣又皆入可汗府庫  
孰與棄昆弟積年之歡而結子孫無窮之怨乎鄭公之  
言全述此意可以見夷狄無親惟利是動也

潘岳譏訕

潘岳晉武帝時辟司空太尉府舉秀才泰始中帝躬耕  
籍田岳作賦以美其事才名冠世爲衆所疾遂棲遲十  
年出爲河陽令負其才而鬱鬱不得志時尚書僕射山  
濤領吏部王濟裴楷等竝爲帝所親遇岳內非之乃題  
閣道爲謠曰閣道東有大牛王濟鞅裴楷韜和嶠刺促

不得休然則岳之取禍蓋亦恃才不遜之所致耳縱使  
孫秀不銜之亦何能以自免哉

題趙清獻公墓詩

宋趙清獻公抃墓在衢州府城東北四十五里宋景定  
間林存爲潭州帥罷歸道衢調千夫荷擔經墓旁疲甚  
因相與語趙清獻公抃一琴一鶴那有許耶或聞之題  
詩驛舍曰千夫荷擔在山阿膏血如何有許多不若扁  
舟徑歸去休從清獻墓前過

趙葵幼慧

宋趙南仲葵父方寧宗時爲京湖制置使葵每聞警報

與諸將偕出遇敵輒深入死戰諸將惟恐失制置子盡  
死救之屢以此獲捷一日方賞將士恩不償勞軍欲爲  
變蔡時年十二三覺之亟呼曰此朝廷賜也本司別有  
賞賚軍心賴此一言而定人服其機警

牛心山脈

四川龍州宣撫司東南有牛心山昔唐祖李龍遷葬於  
山側武后革命命鑿斷山脈水赤如血及玄宗幸蜀有  
老人蘇坦奏龍州牛心山國之祖墓今日蒙塵之禍乃  
則天掘鑿所致玄宗卽命龍州刺史修填如舊未幾誅  
祿山乃升州爲都督府賜號靈應郡此說予以爲謬妄

之甚也夫武氏旣鑿斷山脈則李氏衰矣玄宗何以復  
興玄宗命填其斷處則地理家所謂客土無益也吁玄  
宗以勵精用賢而興以荒淫用姦而敗於山脈何與哉

論宰予公伯寮

洪武癸酉崇仁縣儒學訓導吉水羅公恢上疏言孔子  
廟廷從祀者當以道學論當時有若優於宰予論語記  
有若言行者四皆有裨於世教記宰予者亦四皆見責  
於聖人宜以有若居十哲位次而宰予居兩廡公伯寮  
沮壞聖門不宜從祀蘧伯玉孔子之故人行年六十而  
化今居兩廡六十位次之下未當宜例陞啓聖王廟疏

奏不報時皆服其論之當云

夏口城

武昌府城西黃鵠山有夏口城吳主孫權所築對岸則入沔津故城以夏口爲名至劉宋順帝時柳世隆等守之沈攸之攻之不克梁末陳初周將史寧爲土山長梯攻之不能破黃巢之亂止陷其外城蓋其城依山負險周迴不過二三里乃知古人築城欲堅不欲廣也

頒書學校

洪武中以夷陵州學正延平張先生智試禮部左侍郎先生首言宜以書籍頒布北方學校議者以費財不便

先生正色曰使賢才彙征利益生民何惜此費衆大慙卒從此議

霍氏衰

漢張安世子千秋與霍光子禹武帝時俱爲中郎將將兵隨度遼將軍范明友擊烏桓還謁大將軍光問千秋戰鬪方略山川形勢千秋口對兵事畫地成圖無所忘失光復問禹禹不能記曰皆有文書光由是賢千秋以禹爲不材歎曰霍氏世衰張氏興矣吁光旣知子之不材而不能避遠權勢以爲保身全家之計反因妻邪謀以怙寵榮其覆族也宜哉

李舟語

唐御史李舟曰使釋迦生中國設教當如周孔使周孔生西方設教當如釋迦天堂無則已有則君子生地獄無則已有則小人入君子贏得爲君子小人枉了爲小人此語雖近俗亦理到之言也

論三焦

蘇黃門龍川志云彭山有隱者通古醫術與世諸醫所用法不同人莫之知單驤從之學盡得其術遂以醫名於世治平中予與驤遇於廣都論古今術同異驤旣言其略復嘆曰古人論五臟六腑其說有謬者而相承不

察今欲以告人人誰信者古說左腎其府膀胱右腎命門其府三焦丈夫以藏精女子以繫包以理主之三焦當如膀胱有形質可見而王叔和言三焦有臟無形不亦大謬乎蓋三焦有形如膀胱故可以藏有所繫若其無形尚可以藏繫哉且其所以謂之三焦者何也三焦分布人體中有上中下之異方人心湛寂慾念不起則精氣散在三焦榮華百骸及其慾念一起心火熾然翁撮三焦精氣入命門之府輸寫而去故號此府爲三焦耳世承叔和之謬而不悟可爲長歎息也予甚異其說後爲齊州從事有一舉子徐遁者石守道之壻也少嘗

學醫於衛州聞高敏之遺說療病有精思予爲道驪之言遁喜曰齊嘗大饑羣句相鬻割而食有一人皮肉盡而骨脈全者遁以學醫故往觀其五臟見右腎下有脂膜如手大者正與膀胱相對有二白脈自其中出夾脊而上貫腦意此卽導引家所謂夾脊雙關者而不悟脂膜如手大者之爲三焦也單君之言與所見懸合可以正古人之謬矣今醫家者流皆執叔和三焦無狀空有名以自信不聞有此說故錄之

歸姓表

唐鄭準爲荆南節度使成汭從事汭本姓郭代爲作歸

姓表云居故國以狐疑望鄰封而鼠竄名非伯越浮舟難效於陶朱志在投秦出境遂稱於張祿未遑辨雪等涉艱危其後范文正公幼從母適常山朱氏冒姓名朱說登第後乞還姓表遂全用鄭語云志在投秦入境遂稱於張祿名非伯越乘舟偶效於陶朱議者謂文正公雖襲用古人全語然本實范氏當家故事非攘竊也今考范集無此表恐好事者以此一聯酷類文正事故附會以爲其表語不可知也

藝海珠塵宋志海對秦出京道...  
我夫云母姑因以...  
...  
...

藝海珠塵

子部小說類

宋四... 南淮 吳 省蘭 泉之輯

海寧 吳 衡照 誠懸校

抱璞簡記

姜南簾 里貫已見

容直

宋魯宗道為正言言事違忤真宗稍忌之宗道一日自  
訟於上前曰臣在諫列言事乃臣之職陛下以數而忌  
之豈非有納諫之虛名俾臣負素餐之辱矣臣切愧之  
謹願罷去上喜其忠慤勉而遣之他日追念其言御筆

題殿壁曰魯直呼真宗可謂盛德之主矣直而容之久而思之非盛德而能若是乎求之前代其漢文帝乎

韓通瘞骨

五代韓通少應募以勇力聞累官侍衛親軍副都指揮使周顯德二年河北大兵之後遺骸滿野通悉令收瘞爲萬人冢命記室賈湘刻石紀其事立於無極縣觀此則通之大節顯著者固然也彼王全斌曹翰能辦此乎

龍溪四六

宋四六以汪龍溪彥章爲出類建炎卽位詔是其筆也又見賀呂成公頤浩初大拜啓有云方羣臣憂杞國之

天靡遑朝夕乃兩手取虞淵之日重整乾坤語亦莊麗

道兄官弟

子同年劉世光作教泰州士子有從陽明之學者彼此以道兄相呼而州人王貢分教崑崙其兄嘗名呼貢貢謂其兄曰吾已有官不可呼名當以官弟稱之世光謂子道兄官弟豈非一切對時有廣西上凍州同知濟南劉君紀在坐亦言凍州土官知州趙元恩年幼其母與太平陸監生相通元恩常以契父稱之而土人稱土官之妻曰官娘契父官娘亦可作對皆新聞也可哂可哂

榴花詩

粵海味集

抱璞簡記

七

白樂天榴花詩有云山榴花似結紅巾容艷新妍不占  
春其語蓋出於隋孔紹安榴花詩紹安詩云只爲來時  
晚開花不及春按紹安大業末爲監察御史時唐高祖  
爲隋討賊於河東詔紹安監高祖之軍深見接遇及高  
祖受禪紹安自洛陽間行來奔高祖見之甚悅拜內史  
舍人時夏侯端亦嘗爲御史監高祖軍先歸朝官祕書  
監紹安因侍宴應詔詠石榴曰祇爲來時晚開花不及  
春時人稱之吁工則工矣其如立身之大節何

### 花信風

二十四番花信風者蓋自冬至後二候爲小寒十二月

節氣月建在丑地之氣闕於丑天之氣會於子日月之  
運同在元枵而臨黃鍾之位黃鍾爲萬物之祖是故十  
一月天氣運於丑地氣臨於子陽律而施於上古之人  
所以爲造歷之端十二月天氣運於子地氣臨於丑陰  
呂而應於下古之人所以爲候氣之端是以有二十四  
番花信風之語也五行始於木四時始於春木之發榮  
於春必於水土水土之交在於丑隨地闕而肇見焉昭  
矣析而言之一月二氣六候自小寒至穀雨凡四月八  
氣二十四候每候五日以一花之風信應之世所略言  
曰始于梅花终于楝花也詳而言之小寒之一候梅花



二候山茶三候水仙大寒之一候瑞香二候蘭花三候  
山礬立春一候迎春二候櫻桃三候望春雨水一候菜  
花二候杏花三候李花驚蟄一候桃花二候棗棠三候  
薔薇春分一候海棠二候梨花三候木蘭清明一候桐  
花二候麥花三候柳花穀雨一候牡丹二候茶蘼三候  
棟花棟花竟則立夏矣

耳邊風

諺云耳邊風按杜荀鶴題兜率寺閑上人院詩云百歲  
有涯頭上雪萬般無染耳邊風用之亦不覺爲俗耳

羽林行

唐王建作羽林行云長安惡少出名字樓下劫商樓上  
醉天明下直明光宮散入五陵松柏中百回殺人身合  
死赦書尚有收城功九衢一日消息定鄉吏籍中重改  
姓出來依舊屬羽林立在殿前射飛禽觀此詩則李唐  
中葉無復有法守矣天子輦轂之下軍士之驕有司之  
慢如此則藩鎮之不用命宜哉其不可國也明矣

詩能言旅况

崔塗除夜有感云迢遞三巴路羈危萬里身亂山殘雪  
夜孤燭異鄉人漸與骨肉遠轉於奴僕親那堪正飄泊  
明日歲華新鄭谷蜀城春望云天涯憔悴身一望一沾

中在處有芳草滿城無故人懷才皆得路失計獨傷春  
青鏡不忍照鬢毛應更新崔之後聯鄭之前聯二詩可  
謂委曲形容旅况中之滋味者非富貴安逸不出戶庭  
者口中所能道

詩有規戒

唐劉德仁有送友人下第歸觀詩云君此卜行日高堂  
應夢歸莫將和氏淚滴著老萊衣嶽雨連河細田禽出  
麥飛到家調膳後吟好送斜暉此詩深有規戒之意與  
泛然送行專詠情景者遠矣

寫詞述懷

扶風馬大夫作詞述懷聲寄滿庭芳云雪點疎髯霜侵  
衰鬢去年猶勝今年一迴老矣堪歎又堪憐思昔青春  
美景無非是月下花前誰知道金章紫綬多少事憂煎  
侵晨騎馬出風初暴橫雨又淒然想山翁野叟正爾  
高眠更有紅塵赤日也不到松下林邊如何好吳淞江  
上閒了釣漁船大夫名晉字孟昭嘗仕國初東吳人也  
始終不異

成化七年九月二十日南京吏部尚書致仕蕭山魏公  
驥卒年九十有八是歲八月二十八日憲宗皇帝以公  
齒德俱邵遣行人張和齋敕存問曰卿以醇篤之資正

大之學歷事累朝官登八座歸安田里壽屆百齡進退  
從容體履康裕緬惟風采嘉歎不忘茲特遣行人齋敕  
存問并賜羊酒仍令所司月給食米三石優贍終身卿  
宜倍加調攝益隆壽祉佇聞讜論用慰渴思卿其體朕  
至懷及九月甲申公覺神思少怠不肯治藥物但曰一  
息尚存此志不容少懈卽檢平日四方士大夫卷冊索  
題識者次第書之俾還其人復書遺命屬其子完曰倘  
至瞑目朝廷或有恩恤之典宜辭之越四日戊子賦詩  
寫字如常己丑晨起盥漱就枕曰吾平生不作欺心事  
一點靈光直上行及目將瞑男女哭踊復起坐舉手加

額曰無以報朝廷無以報朝廷遂卒卒之前一夕有大  
星隕于里人王文政庭中光燭間巷明年正月計聞上  
悼惜遣官諭祭爲營葬事壬辰夏完赴闕以公遺言懇  
辭營葬上從之復以蕭山知縣李鞏言賜諡文靖

### 鐵胎銀

今世之造假銀者或以鐵或以銅或以鉛錫爲質外裹  
以銀皮不復辨其僞也按五代史慕容彥超爲秦寧節  
度使好聚斂在鎮嘗置庫質錢有奸民爲僞銀以質者  
主吏久之乃覺彥超卽陰教主吏夜穴庫垣盡徙其金帛  
於他所而以盜告彥超卽榜於市使民自占所質以償

之民皆爭以所質物自言已而得質偽銀者寘之深室使教十餘人日夜爲之皆鐵爲質而包以銀號鐵胎銀其被圍也勉其城守者曰吾有銀數千錠悉當以賜汝軍士私相謂曰此鐵胎銀爾復何用哉皆不爲之用城被夫妻投井死周太祖滅其族

### 唐鑑銘

籀冠徐延之云古鍾鼎彝敦盤盂卮鬲其款識文多古鳥迹蝌蚪書法簡古人多不能識獨唐鑿質鑑背銘篆文明易蓋唐故物也其詞亦平易銘云鍊形神冶瑩質良工如珠出匣似月停空當眉寫翠對臉傳紅光含晉

殿影照秦宮鐫書玉篆永鏤青銅凡四十字學齋佔畢亦載此鑑銘纔八句子已錄之此銘校之佔畢所載不但多二句其詞義尤勝云

### 守令以愛民爲心

邑令乃字民之官關係攸重魯論一書吾夫子獨丁寧於爲宰爲令之戒而他職不與焉實以得百里之地而君之乃斯民休戚之寄故曰可以寄百里之命然必在乎爲之收守者充聖門之意及聖人之心申飭而勞勉之具寬恤通情以待之其不我從而厲民者必汰斥之則民勞可小康矣余嘗觀朱文公語錄所載一事云

至說王十朋詹事守泉州初到任會七邑宰勸酒歷告以愛民之意出一絕以示之曰九重天子愛民深令尹宜懷惻隱心今日黃堂一盃酒使君端爲庶民斟邑宰皆爲感動余因歎王梅溪固自得聖門勉邑宰之遺意而朱徵國文公表而出之以爲儒生作牧之式民之幸也其後真西山先生希元帥牧潭州會長沙十二縣宰有詩云從來守令與斯民都是同胞一體親豈有脂膏供爾祿不思痛癢切吾身此邦祇似唐時古我輩當如漢吏循今日湘潭一卮酒直須散作十分春及帥福唐又有會三山十二宰古風一長篇甚惻怛近年王賓齋

去非守平江會兩倅六邑宰詩曰守令張官本爲民恫瘝無異切吾身但令六縣皆朱邑何必黃堂有信臣田里要須興孝弟閭閻謹勿致嘔呻與君共舉一杯酒化作人家點點春及移鎮宣城又有飲諸縣宰詩二賢同本與梅溪微意固一世名德足以聳動貪酷之吏而禔其魄然子嘗觀唐呂溫知衡州送毛令絕句曰布帛精粗任土宜疲人織紵每先期今朝臨別無他祝雖是蒲鞭也莫施則知王梅溪又體此意而推廣之也呂溫在八司馬之流何足道哉而愛民之心乃能如此則今之爲太守者不恤縣令虐取厲民於諸邑惟視其督課之

多寡以爲殿最烏乎之人也不寧爲孔聖及朱子之罪人也而竇梅溪西山竇齋之罪人也抑又可惜而爲三君子之罪人乃呂司馬之罪人也可不深嗟而甚疾之耶余將指梓部六年常跋視民如傷四字每銓量本部知縣卽與一本蓋推廣明道先生之語也無問其知行之篤然刊諸石以上者獨江安馮宰大足先宰蓬溪吳宰三人而已吳宰又爲一跋於其下詞旨甚佳予怪其右列細訪之乃其館客令狐叔子之作也然吳宰之政民甚安之至有頌其德政而相率詣本臺借留者又嘆儒冠之反不如鶻冠若也此眉山史繩祖之錄也夫守

令親民官也國家之制察之以六條儆之以戒石豐之以俸祿之養待之以不次之擢欲其惠養元元也使其君子耶則念聖賢之訓守朝廷之制而留心撫字使其小人耶則縱恣貪酷惟欲之營刑憲且不顧而何能守聖賢之訓哉讀此未嘗不三歎也

神宗論羌虜

宋神宗嘗因便殿與二三大臣論事已而言曰嘗思唐明皇晚年侈心一搖其爲禍有不勝言者本朝無前代離宮別館游豫奢侈非特不爲亦不暇爲也蓋北有狂虜西有黠羌朝廷汲汲左枝右梧未嘗一日不念之二

虞之勢所以難制者有城國有行國古之夷狄能行而  
已今兼中國之所有矣比之漢唐最爲強盛大臣皆言  
陛下聖慮及此二虜不足撲滅矣上曰安有撲滅之理  
但用此以爲外懼則可觀此言則勤兵遠略非帝之本  
心也而開邊生事黷武虐民皆邀功之臣啓之也其罪  
可勝言哉

試畫工形容時題

螢雪叢說云徽宗政和中建設畫學用太學法補試四  
方畫工以古人詩句命題不知掄選幾許人也嘗試竹  
鎖橋邊賣酒人家皆可以形容無不向酒家上著工夫

惟一善畫者但於橋頭竹外掛一酒帘書酒字而已便  
見得酒家在竹內也又試踏花歸去馬蹄香不可得而  
形容何以見得親切有一名畫克盡其妙但掃數蝴蝶  
飛逐馬後而已便表得馬蹄香出也果皆中魁選夫以  
畫學之取人取其意思超拔者爲上亦猶科舉之取士  
取其文才角出者爲優二者之試雖下筆有所不同而  
於得失之際只較智與不智而已

點絳脣

瞿存齋詩題菊作點絳脣極韞藉令人悅妙其詞云花  
稟中黃挺然獨立風霜表冒寒開了占得秋多少 止

是重陽蝶亂蜂兒遶歸田早爲誰傾倒有個柴桑老  
菊莊劉隱君亭於南屏葉文甫家九月見梅賦小詞亦  
點絳脣云菊老蓉殘小園鷲地聞清馥陰消陽復的  
花如玉 結實調羹早獻黃金屋甘幽獨要知心腹除  
是松和竹是可與聯鑣者矣 又見眉庵楊孟載基咏  
鶯亦有點絳脣云何處飛來柳稍一點黃金小弄晴催  
曉喉舌如簧巧 春夢須臾正繞江南道空相惱被他  
驚覺綠遍池塘草尤纖麗圓融可愛 元滕翰林玉詠  
墨本冰仙花點絳脣更一氣流出詞云縞袂啼香爲誰  
一滴春心碎淡黃深翠不似當時態 東洛經塵依舊

交情耐空憔悴玉人何在細雨疎烟外然皆本宋和靖  
林處士通 春草詞意來林詞亦點絳脣也金谷年年亂  
生春樹誰爲主餘花落處滿地和烟雨 又是離歌一  
闋長亭暮王孫去萋萋無數南北東西路

王端毅公奏疏

成化二十一年刑部主事林公俊後府經歷張公黻皆  
以言事切直得罪三原王端毅公怒時爲南京兵部尙  
書復上疏云臣荷國厚恩庸劣無補惟願聖德尊顯天  
下又安俾臣等俯仰於無事之天沒齒於太平之日爲  
幸大矣邇聞刑部主事林俊上章陳言忠誠激烈詞氣



過直干冒天威謫官遠方後府經歷張黻爲林俊陳情亦蒙鞫問臣當以林俊等爲戒括囊全身今復昧死而言者非納交於林俊等爲其游說也實爲國家慮耳方今之時外而邊陲黠虜跳梁軍士暴露內而郡縣旱荒太甚民飢而死此誠陛下憂勤惕厲詢謀羣策極力救濟以收人心之時奈何興土木之役爲佛氏之居蓋聞僧伽之言張大佛法之功予以尊之崇之資其利益以福斯民而延國祚也殊不知三代以前無有佛法而帝王歷數率皆綿遠三代以後崇信佛法而帝王運祚未聞過之以此觀之佛法之無益於世也明矣其爲不足

信也審矣且天地生成萬物祖宗創業垂統孔子明道立教其功其德豈佛氏所能彷彿其萬一然而京城止設一壇祀天地內府止設一太廟祀祖宗京師以及天下郡邑亦各止設一文廟祀孔子就使佛法有靈其功德可比隆乎天地祖宗孔子其佛寺亦不宜多於天地祖宗孔子之壇廟也今都城內外佛寺不知幾千百處茲又欲建營佛寺於皇城之側遷徙軍民多百餘家計費帑藏銀數十萬兩似爲過之然安土重遷人之情也今一旦拆人房屋徙之於他處欲人心安得乎帑藏銀兩所以備兵荒也今乃以爲建寺之資使民飛輓於道

路轉死於溝壑欲人心悅得乎人皆知此事之非宜而  
不言獨林俊言之者是林俊能盡忠於陛下而不顧身  
家也人皆私議以爲林俊之言是亦無一人公言於朝  
獨張黻言之者是張黻亦能盡忠欲陛下納諫旌直以  
隆治道亦可嘉也今皆不知省而悉置之此臣之所未  
喻也臣恐由是人皆以言爲諱設有讒佞之害政奸邪  
之誤國誰復言之陛下何由知之又造宮殿爲梁爲棟  
大楠木南京各廠已無一根近來修孝陵明樓差官前  
去四川徧歷山谷尊採五年僅得五根數內堪中者少  
不堪者多起動數千人夫止拽一根到於水次餘者尙

未出山此等大木誠爲難得不知在京各廠堪作大梁  
大柱楠木幾多可勾幾座宮殿之用誠不可不愛惜以  
備用也陛下仁如帝堯孝如大舜自踐祚以來不畋獵  
不游幸未嘗妄興一旅之師亦未嘗妄戮一無辜之人  
誠不世出之明主大有爲之聖君也不意偶然有此蓋  
未之思耳此臣所以日夜懷慮而不能已於言也伏乞  
聖慈收雷霆之怒解恢恢之網復林俊等之職慰天下  
之望暫停建寺之役專理兵刑之政如此庶幾四夷向  
化九有歸心宗社可以鞏固天命可以永保矣疏奏上  
納其言斥繼曉停建寺復林俊等官蓋十一月十九日

也是歲正月元日有星變越三日上以星變求言敕諭云茲者上天垂戒災異迭見去歲暮并今正日星變有聲如雷朕甚警懼惟天道與人事相爲流通必人事乖違斯天道不順文武百官皆與朕共天職者爾而五府六部都察院大理寺通政司堂上官六科十三道官付託尤重凡一應弊政及有利於國家生民之事其各指實陳奏無或顧忌朕當采而行之用回天意故諭時有禮部進士敖毓元上疏以爲臣聞君天下者不患上天之有變惟患於有變之不警不患於有變之不警惟患於警變之不誠臣請借前籌以明之飛雉雖鼎昔在中

宗非無變也然遂以之而中興旱魃爲虐昔在周宣非無變也然亦以之而中興此無他蓋由二君恐懼修省出於至誠故卒能回變而爲祥易災而爲福易曰亡者保其存者也亂者有其治者也斯言益可驗矣但後世之君或有變而不能警或警變而不誠及至潰裂四出災害並至不可救藥則又諉之於天數其自誣益甚矣恭惟陛下於今月初三日以元日日西星隕如雷敕文武百官各舉弊政無或顧忌且曰必人事乖違斯天道不順大哉皇言乎至哉皇心乎誠可謂達天人之理而知所以恐懼修省之要矣誠行之以誠尙何不能回天

變以爲天休而與商宗周宣侔德媿功哉夫唯至誠可以動天臣恐陛下所咎自新之言未必盡出於至誠也臣昧死先言陛下所以修省之未誠而後及所以致變之由與夫所以弭變之道臣伏觀前史所載星之爲變不一然未有有聲而在日在春王之正月在正月之元旦者蓋正月爲一歲之始元旦尤正月之始斯時斯際正王者之政令除舊更新之時也然去歲地震旣以正月之二日今歲星隕又以正月之元日誠前史之所未載前古之所未有而爲莫大之至變矣夫有莫大之至變宜加莫大之警省不爲文飾一以至誠斯庶可矣陛

下今日之修省誠果至盡乎羣臣罷宴似矣何於大臣旋有綵段之賜不知陛下爲此是果賞之乎則臣未聞職居大臣與天子共理天下翻以天變而見賞者抑果愧之乎則今日天變正君臣上下交相警懼之秋陛下諒知引咎自歸必不專以此爲臣下愧矣無乃陛下之私人間有恐其發己之奸惡暴己之罪名故假託他詞蠱惑聖心以此箝大臣之口如王曰美珠之賜者耳雖然大臣恬然受之不以爲意亦可歎矣以此修省似非至誠之道也佛寺罷建似矣何乃僧道神佛繪像之賜聖意豈謂崇奉三教足以冀其神靈以弭天變乎殊不

知繪像之與寺宇功程孰大費用孰多崇奉孰至前日  
寺宇之建尙不足以保天之不變會爲今日繪像之賜  
又足以格天於旣變哉矧彼二教游手游食無父無君  
悖理滅天使天而有口則必詈之矣使天而有手則必  
擊之矣豈可崇奉以重天之怒哉甚至御寶者天寶也  
御贊者天語也陛下又且加之於觀音繪像之上彼之  
承賜者又且炫耀於通街大衢以爲布施之資使市井  
小兒皆得手指天寶口戲天語甚爲瀆天以此修省似  
昧至誠之道矣去歲林俊張黻以直言去國陛下悟其  
直而復其爵於理誠當而公矣然而所言之人猶偃然

居位如故而彼二人者顧乃遠置於南京是亦疑有追  
仇盡言之恨保暱奸回之意於私或難免矣一念之間  
公私交戰至誠之道似不如此夫陛下當天變之時警  
省之初意猶未能盡出於誠則天下之人寧不疑今日  
之敕諭徒爲虛飾哉若夫致變之由雖因人事之失然  
今天下大勢如人重病內自五臟外達四肢無不受病  
其失未可枚舉抑亦以陛下之求言如是廟堂科道必  
有能言之者臣惟四事所急於治亂安危之幾所大當  
警懼而修省者爲陛下詳陳之大臣者朝廷之股肱陛  
下所宜考慎其人朝夕親近以商確治體者也適年以

來選擇之際多出於左右之私而不本於輿論之公剛大正直者或遺棄於外疲懦軟熟者或置之於位名雖廁於具瞻實則漫無可否甚至以阿諛取容爲巧術以模稜依違爲奇計以故天下大柄歸於內臣之掌握致使其勢焰薰灼傾動一時在內則招立權勢以累聖政在外則獵求州縣以困民生陛下方且庇之以爲我之私人此內臣之權所以日重大臣之權所以日輕然重者旣挾其所重以恣其城狐社鼠之威輕者又借力於所重以爲蠅營狗苟之謀則夫今日政事之隳紀綱之紊是皆大臣失職之所致也臺諫者朝廷之耳目陛下

所當遴選其人以補拾遺糾劾奸邪者也邇年以來選擇之際皆取其軀體之魁梧丰姿之俊偉略不問其才識之如何夫惟選卒伍者以強壯爲尙然則臺諫豈卒伍之地言職豈執殳之役哉古云千里一賢猶並肩而立百里一聖猶旋踵而至是蓋謂人才之難得也今陛下始而選之旣不精及其去之又太甚是以有限之才應無窮之去尙何望得實才之用哉旣而去之又不見補致使臺諫之位十有五虛是豈盛世之美事耶此蓋由前者陛下所行所處不能盡合於規矩惟恐諫員充實則有暇以議吾之非正直見用則敢言以妨吾之

便耳老佛者所以惑世誣民害吾正道所當去者也何  
陛下邇年以來敬之如天地信之如箴龜陛下所以敬  
信之者將欲賴之以垂佑生靈歟然而驗之於今則黃  
冠緇流終年祈雨翻以致旱將欲賴之以延壽聖躬歟  
然而稽之於古則梁武宋徽傾心崇奉卒以賈禍此其  
不足信之明驗也況今之所謂道家者實本張天師之  
誣教而採摭老氏虛言之說以文其深摘取方士延年  
之術以神其利是皆偽妄欺誑者耳若彼佛氏輪迴果  
報之說恒河劫界之事又爲誣天地之道攘造化之功  
其欺誑之罪又有甚於道教者矣書曰作善降之百祥

語曰仁者壽吾聖道之中自有福壽之地陛下何爲取  
彼以爲聖明累哉名器者所以辨別貴賤以嚴上下所  
當惜者也何陛下邇年以來傳奉之詔大起於內廷銓  
擢之權不專於吏部奇袞左道彼何人斯亦得坐膺金  
紫之榮工匠藝術彼胡爲者亦得與吾縉紳之列后家  
有何經國之大猷得以世襲伯爵妃家有何克敵之殊  
勲得以世爲都督太保所以保王躬者也惟周召克當  
何滿朝之皆然蔭子所以厚功臣者也惟大臣有之何  
內宦之亦然甚至寫道經獻異書冠帶滿朝無慮三千  
致使飛金布羽捷進旁蹊匱寶囊珍巧趨曲徑上下成

風恬不爲怪臣不圖聖朝之明明如此而顧有頽風之靡靡如彼也且以理而論之位曰天位爵曰天爵祿曰天祿蓋以明其出於天非人君之所得私者今乃如是不幾於逆天乎不幾於拂天乎就以利而言之歲糜廩祿不下萬萬石數且此又有皂隸之錢陛下若推此以爲民饑之賑以爲軍儲之備夫豈不實爲上策何爲徒浚民膏血以養此銅臭無用之物哉凡此四事是皆人事之乖違以致今日之天變者也然致變之由旣以四者之人事有乖違則弭變之道當於四者之人事而修警修警以言而不以行變不可弭也修警以行而不以

誠變不可弭也何也人可欺也天不可欺也天唯至誠可以動之也何以知之詩曰昊天曰明及爾出王昊天曰旦及爾游衍蓋以天體事而不遺不可欺也於上文則曰敬天之怒無敢戲豫敬天之渝無敢馳驅蓋以天不可欺所以一有變渝不可不敬而又敬也敬而又敬至誠之道也至誠者吾心之天也天人之理相爲流通吾心之天一誠則在天之天必格矣伏願陛下思祖宗付託之重體天心警愛之至奮發英斷大加警修於臣所陳之四事鑒前日何爲而有失思今日何爲而方是改絃易轍除舊圖新勿二以二勿參以三一本於至誠



則天變可回天休可返今日明論不為虛文而有實休矣臣所陳者實有關於天下安危治亂之幾有非毛舉細事之瑣瑣者願陛下不以臣之卑賤而易其言萬一涓埃有補於海嶽則雖被妄言之誅實所甘矣

大臣不協

正統戊午都御史陳智侍郎李庸不協各發其私為言官所劾上以大臣多在劾中惟吏部侍郎魏驥刑部侍郎何文淵無所涉特命二公鞫之智庸詭辨不伏二公曰為大臣者何乃若此耶智庸慚伏遂議免二人官奏入上是之

積薪

文子曰虛無因循常後而不先譬若積薪後來者居上西漢書汲黯之言蓋引此為用也

新安謠以下六條見五  
庄日記今附此

廬陵李公昌期永樂甲申進士累官河南左布政使嘗賦新安謠云新安野老髮垂肩說着先朝淚泫然洪武初年真事少幾曾經到縣衙前垂老頻逢歲薄收秋租多欠賣耕牛縣官不暇憐飢餒喚拽官車上陝州當夫當匠子孫忙田地荒蕪戶有糧昨日迺西番使過盡馬婦女趕牛羊吁以今觀之則民之困苦又甚於彼時也

陸景

成化間刑部郎中歷任年深者有常熟陸景麗水金文  
 二人皆景泰二年進士善戲謔景面黑而齒白文嘗嘲  
 之曰黑象口中含玉齒景應聲曰烏龜背上嵌金文景  
 自以年深當有不次之擢道逢刑部尚書陸公瑜大理  
 卿王公槩乘肩輿因避馬卽爲口號云陸老前頭去王  
 公逐後來明年二三月也有轎兒擡諸公聞而惡之遂  
 有福建參政之擬景行察家餞之復對衆朗吟云非是  
 區區欲大參奈因兩鬢雪穆穆諸公側耳朝端聽一道  
 清風振斗南後又寄詩京師諸故舊云再三上覆眾哥

哥人事無多沒奈何只有新書并手帕並無緞疋與紗  
 羅聞者益怒遂不復進云

以法律治妖神

漳州龍溪縣赤嶺寺旁有祠每有毒氣中人鄉人以爲  
 瘴厲往往搬戲賽神男女喧闐時永豐徐恭知府事諭  
 知其事乃令人赴府言狀恭率吏振金鼓集祠下繫塑  
 像詣前令踏于地責以殃民狀問杖一百流三千里罪  
 令奉香火者代承款舉像擲之江翼日雷震祠所有巨  
 礮死焉其害遂絕恭字克敬時洪武十三年也

鄰居占地

藝海珠塵

抱璞簡記

楊玠仕蜀至顯官隨王衍歸後唐以老致仕歸長安舊居多爲鄉里侵占子弟欲詣府訴之玠批狀尾云四鄰侵我我從伊畢竟須思未有時試上含元殿基望秋風吹草正離離吁士大夫務廣田宅不訓子孫以學未必不爲後來勢家奄有玠寧不爲達士乎

獻楊梅仁

王凝字豐父守會稽童賈時方用事質苦腳氣或云楊梅仁可療是疾豐父哀五十石以獻之後擢待制再任不歷貼職徑登次對惟豐父一人此揮塵錄所載也吁孟佗獻涼州之酒程松市北珠之冠小人之恒態也不

知五十石楊梅仁何以能哀乎

按察司官糾劾

國初改元肅政廉訪司爲提刑按察司設使副僉事官使糾察在外大小貪酷不職官吏兼理刑名其任最重與在內都察院相同今則專理刑名不復聞有糾劾之舉如國初故事常讀密庵集謹記一事於此云洪武十七年六月二十五日福建按察使陶屋仲僉事謝元功劾左布政使薛大昉貪淫事既奏准令按察司就行取問大昉亦造謗還詞有旨都提取赴京於都察院聽對屋仲糾劾事得實大昉伏誅屋仲等還憲職屋仲等初

被召時聞中百姓爲之謠曰陶使再來天有眼薛公不  
去地無皮後陶復任百姓踊躍相慶屋仲名鑄鄞縣人  
洪武十五年聘授監察御史剛直敢言劾奏刑部尚書  
開濟得君欺君太師韓國公李善長肆奸擅權遂擢福  
建按察使元功名肅上虞人洪武中以明經舉授福建  
按察僉事能詩文有密庵集大叻保定府蠡州人洪武  
四年進士

四年進士  
四年進士  
四年進士  
四年進士  
四年進士  
四年進士  
四年進士  
四年進士  
四年進士  
四年進士

藝海珠塵

集部別集類

南匯 吳 省蘭 泉之輯

諸暨 蔣 一經 龔之校

一樓居詩稿

馮 祝篋 祝字古浦號桐庭江蘇婁縣人布衣工詩書歷遊封圻幕府著述多散失歸隱

年八十 四卒

卷上

邨中晚興次韻

風景清江曲 翛然意往還 農人歸欲盡 邨路晚來閒  
霞錦明遙渚 雲容結好山 亦知心獨賞 涼月到松關

藝海珠塵

一樓居詩稿卷上

一

護稻乘天霽腰鎌露欲晞  
今秋真得歲數口已忘飢  
野雉驚人起田鳥作隊飛  
風光悅餉婦采菊笑言歸

再過慎公房次韻

一水塵氛隔隨雲共入林  
不教漫相識爲許數來尋  
高論添秋爽疎鐘帶日沉  
殷勤贊公意終擬妙香吟

留宿未果

山居

曾聞岩穴結柴關  
棲隱高風何處攀  
宏景掛冠終句曲  
元暉築室戀青山  
松雲在隴情俱逸  
猿鶴馴階意自閒  
一任藤蘿封谷口  
不留捷徑向人間

山居

沮溺心期尚可論  
躬畊小住遠人邨  
看光桃杏紅生圃  
晝影桑麻綠到門  
酣醉淵明居栗里  
飄零子美寄東屯  
不須避世稱高蹈  
城府應無足跡存

歸興三首

回憶飄零歲月長  
春來閒夢滿匡牀  
半生已就繁霜鬢  
四海空餘熱血腸  
老愛詩篇情不倦  
貧栽花竹趣難忘  
鹿門栗里寧無伴  
許共頑身早善藏  
樹頭紅紫忽朝華  
眼底青門又種瓜  
世故備嘗多感慨  
天涯行遍莫矜誇  
身歸畝畝機方息  
春到郊原事漸加

麥隴菜畦憑杖履未妨風味在田家  
日向西沉返照東酒家爐畔想王戎壯心空擲車塵裏  
好夢銷歸萍聚中艷舞不逢青眼客醉歌應付白頭翁  
高陽舊侶今零落獨守柴門老敬通

雲西堂老桂樹歌示楊子寄山

護西堂東老桂樹擁腫無枝根本固兀立空庭歷歲多  
吳剛有斧斫不去憶予髫髻到琳宮雲西主人爲大龔  
主人與余重瓜葛嬉遊每顧小山叢秋日婆娑花自好  
分來天闕清香早抱柯翳葉爛生金得伴黃芽龍虎繞  
余從書劍走天涯飄零半百始問家可堪故里老成盡

不獨興悲一桂花大龔玉棺成久閉法屬已傳四五世  
寄山羽客稚川徒元風繼暢雲西地今余歸爲農者流  
閒向雲西覓舊遊摩挲此樹依砌在劇憐老態明青眸  
桂乎桂乎意突兀伯仲蘭梅舊仙骨石房徑深風月多  
蓬萊水淺奈爾何

病後遣興三首

巨耐經秋病柴門艸不刪披裘聊自遣曳履不辭艱塔  
影亭亭直溪流岸岸閒陽和無限好暖合對衰顏  
連旬困床褥戶外事如何出見比鄰少相逢問疾多湖  
平邨影活風息野光和百折餘生在青山寄嘯歌

向緣奔走累每欲老山林今抱綿延病能堅伏處心小  
橋流細水高樹落清音不是揚雄宅無人載酒尋

同人過蓮水上人二首

白苧城西路臨津此舊亭縈紆兩水碧襟帶九峰青鐘  
韻松間答潮音竹外聽觀空心自遠風俗任郊坰  
人烟連丈室開士結禪棲明鏡無留滓青蓮不染泥樹  
當江岸出舟向市橋低坐爲論詩久渾忘日已西

曼花小集聯句詩

并序

古浦南頭秀塘西畔奇才磊落不乏潘江陸海之流  
壁衲連翩並多殊蜜聰琴之侶走也在昔飢驅南北

投贈恒疎祇今偃息鄉隅倡酬有自漱泉品石用集  
同人擊鉢拈花弗遺方外爰訂嘉平始序謀分香積  
常供會雖一時情足千古衝泥躡屐奚辭昌雨蹒跚  
卜夜翦燈豈慮歸途昏黑山園初摘脆出青蒿廚甕  
方開香浮綠蟻黃梅綻臘芳舒滿院之金穉筍呈鮮  
色映堆盤之玉此何必攢眉而逃白社漫學淵明彼  
無妨飲酒而揖高陽敢同惠遠是何名士清言希典  
午之風遮莫禪僧綺語破如來之戒騁妍拍祕各賦  
五言異曲同工聯成六韻聊將勝事綴以蕪詞

久訂東林約

古浦

今朝冒雨來

駕山

良朋欣得五

咸霑

野衲亦相陪

曉公

小摘清霜菜

白厓

豪傾白墮杯

快雪

晚晴涵翠竹

古浦

臘暖放疎梅

駕山

獨我心先醉

咸霑

諸君量未開

曉公

莫愁紅燭短

白厓

蓮漏已頻催

快雪

臘梅

猶是羅浮夢裏身  
貯歸金屋不勝春  
梅檀合體香仍結  
蜜蠟成脾色更勻  
懶整冰姿依處士  
滿塗嬌額學宮人  
何心五六爭花出  
破臘凌寒獨笑嚬

送別二韓

春雨春風逼禁烟  
輕舟牽綠去前川  
望中多少關情柳  
到處逢迎覺汝賢

除夕

艱難籌四代俯仰事無餘  
老入昇平世新看時憲書  
臯春意動今夜歲寒除  
樓陰溪堂在閒吟自晏如

老鶴

乘軒不屑意獨立抱幽心  
赤壁飛鳴舊青田飲啄深迴  
翔風乃下遠舉跡誰尋  
珠樹夫何慕歸來理素琴

五十生日書懷

荷花香裏記生身  
閱世茫茫五十春  
既往多非已喪我  
只今垂暮豈如人  
欲親稼穡隨農父  
且託邱樊作隱淪  
須識東陽持懺悔  
肯將蒲柳祝秋晨



初訂蓬累稿成

廿載天涯詠載馳滄江送老自刪詩  
濃花嫩蕊驕蓬髻  
細雨輕風引釣絲  
駉氣衰終伏櫪  
蟪蛄吟促不知時  
艱難閱歷前塵盡  
賸取殘編結夢思

重九前三日過鄰翁社飲

風日淡邨容秋雲寫落木  
鄰翁城市歸作社邀飲福云  
值萬寶成菊綻重陽促黃雞  
覺頗肥新酒釀初熟稱賽  
雖慢期敦誠務給足草野  
陋盤飧聊以見鄉俗感茲意  
諄諄因過效分肉長筵列  
大盆坐次無拘束長幼畧推  
遜恭敬視余獨雜亂語不  
佞謙卑故款曲羣醜廢獻酬

殷勤勸相續酒酣話稼穡  
辛苦之積蓄在前旱潦侵昨  
歲風肆毒今年夏雨稀  
納場仍薄穀豈敢怨天公  
適遭白頰頰所幸際太平  
豐登冀將復日來天氣清  
霜遲圃盈綠好景且此時  
高歌樂晴燠陪奉寡嘉賓  
粗味虛口腹莫嫌簡褻多  
留歡夜可卜顧余病方起  
不勝酒力觸扶醉回柴門  
殘陽猶在目

秋水

秋水方澄澈涵虛得遠神  
蕭然能淨客宛在想伊人  
蘆荻刁騷岸芙蓉寂寞濱  
鏡中彫飾去爽氣獨鮮新

同人過曉峯上人二首

曉公避跡菱蘆室野老幽居古浦東地近豈忘雲鶴侶  
綠慳猶阻馬牛風新詩賦就花拈手半偈持來月印空  
我似海翁心不雜願同酒客問琳宮  
近市離山結小園不愁岑寂不愁喧千竿修竹多臨水  
一盞明燈獨閉門精理笑談通白社等身詩卷傲王孫  
慚予已向天涯老遲暮初歸訪醉髡

同漢回過大雅堂看菊德言曉公繼至有作次曉

公韻

今日猶存大雅堂

大雅爲咸書尊公社如先生舊顏

杖藜攜伴問秋芳

愛看元亮新培菊重在康成舊立鄉香撲襟塵同快受

花欺鬢雪獨難藏諸君吟賞多豪邁不道馮平老更狂

次徹庵初冬邨居韻

此地居難卜惟君境獨安諒非同鹿豕應喜遠風湍溪  
靜蘆雙岸窗深竹萬竿交遊峯泖近談笑海天寬客至  
憐清况門開中薄寒愛吟留老樹喜釣鑿新灘衰草生  
涯似黃金世路難祇嚴兩眉守莫向九疑攢

同曉公徹庵過祖花庵訪白厓上人

倦歸惟愛靜次第訪東林古木團精舍清溪空梵音煙  
霞支遁跡筆墨辨才心又得交禪侶從今恣屢尋

徹庵同曉公見過次徹庵韻二首

獨倚溪邊杖心閒見遠山路何愁近涉門不礙常關傲  
骨窮猶在痴名老未刪東邨尋逸侶談笑每忘還  
自知疎懶甚不復爲緣迷地僻人蹤少天寒日色低  
康能蠟屐惠遠愛幽棲來訪西田老時同度野溪

行經邨舍見有梅花乍開同題二絕

春風搖蕩野人家竹外梅依屋角斜無那冰姿自羞澁  
向陽初放幾枝花

遙指茅簷幾點梅引人步履趁香來而今只恐師雄少  
誰作羅浮夢裏猜

花朝雨

已過中和節芳菲覺漸饒春風喧昨夜細雨入今朝  
縷紅生樹浮蛆綠豔瓢祝花曾有許昔年在京曾和孔東塘訂一日爲花朝此日慰無聊

過嬾軒暨葉香林奕光喬梓

次第今朝事山中訪隱居閒花隨步履曲澗遶林廬童  
子慣看客高人多著書獨將遺世意此地羨樵漁

同社諸公過問足疾次韻奉酬二首

閒裏傷遲暮何堪益病愁相憐來好友未得踏新秋鳥  
下舒輕翼雲生豁遠眸一聞歌桂樹頓使憶同遊  
窮途常窘步苦足病垂成惶愧煩人問連翩見友情纖

絺秋氣薄斜日晚涼生厚意諸公在踈齋藉隱名

曉公招同諸子曼花賞桂

鄭重東林折柬邀可堪脚疾兩途遙籃輿未買難隨伴  
秋水纔添可泛船一月笑談緣病減滿懷悵鬱對花消  
采菱雪藕供幽賞鶯嶺香芬此日飄曉公將有南屏之行

浦上晚歸又作次徹菴韻

一棹乘風便歸村未覺遙晚林初過雨秋浦已添潮菱  
近隨船湧雲低掠鶯飄蕭然忘醉醒微月照詩瓢

秋日過菱蘆邂逅慎上人約過雨花

筓幽來竹院落落正逢君脫畧情如故縱橫論不羣

晴花氣入天爽雁聲聞為道秋山好期余弄白雲

和荻邨陽字韻

楓葉將紅菊漸黃三秋好景在重陽人間雞犬依桓景  
山上茱萸笑長房遁跡忘機成落落側身懷古總茫茫  
同心此日堪乘興且向東籬進一觴

和駕山高字韻

前邱登陟不辭勞爽氣晴光滿布袍秫千邨舒老邁  
芙蓉幾岸寫風騷雲羅豈慕冥鴻遠門第空為駟馬高  
菊酒漫成今日醉何須與世愴煮蒿姚氏園傍置馬鬣門庭空閉而已

小春二日同人遊橫雲山限題為韻四首

小春爽氣迥如秋曉霧晴開促勝遊廿里風烟隨短棹  
百番笑語倚同儔山根遠襯人家小岸脚平銜錦樹稠  
直取峯巒最幽處方公祠下好維舟舟行

為向西園覓路行翠微處處有遺楹但當澗壑多留憩  
甚惜傾頽一繫情野菊蔓厓迎客媚亂楓交徑著衣明  
此峯獨占西南勝橫雲在鳳余諸峯之西南今古閒雲只自橫尋西園

鳥道迢迢籀紫氛下方雞犬不相聞荒藤深護癡龍穴  
絕頂高寒野鶴羣山閣孤烟沉佛火浦塘匹練引湖雲  
老年濟勝雖無具踴躍攀躋興可分從白龍洞登絕頂

櫓搖背却夕陽還解舍魚莊路幾灣烟合邨中鵝鴨亂

風清溪上荻蘆閒高朋樽酒留長夜勝集酣歌倚小山  
出則行遊歸飲醉誰言老子不癡頑晚歸集飲小山

哭顧梅岑

招魂無計哭同盟彫謝今偏及老成問疾每難驅二豎  
登仙竟已絕三彭數弓瓦礫桐棺冷半圍風霜蕙帳傾  
况是春秋傷伯道几筵誰與薦粢盛

落花和張玉田三首

繁英何處得重看一片嫣紅滿畫闌曉起幾經憐艷冶  
春深劇為惜凋殘魂消南國招無計香褪東風挹更難  
秀色已非初日事沾泥落水不堪餐

無奈輕盈萬點飄亂隨飛絮過河橋夢回臺上淹紅雨  
仙去樓中冷玉簫散盡彩雲空色相終歸黃土蛻枝條  
世間那有長春國惆悵先摧到阿嬌  
鳥踏空枝囀好音那禁花去綠成陰飛當燕蹴依高下  
流向魚吹弄淺深記拍紅紅能獻色賦星小小未攜衾  
天涯芳草王孫路車馬春風著處尋

次韻和徹庵邨雪行

驚飈入夜聲歇絕曉起忽見盈門雪怪得藜床展轉間  
卧寒衾枕如冰鐵凍雲作勢尚漫漫烟裏邨光皓增潔  
一色凝華縣圃開菜畦麥隴迷行列氣堅澤腹水不流

冷逼梅心花欲發農事雖休告歉多供餐難作雲母屑  
鳥雀驅飢不得棲比戶無衣聲哽咽閉門亦有三日窮  
作賦誰爲一時傑潘子博學常坎軻此日高吟獨擊節  
詩成可賞歡相過徑滑不知屐齒折紙上宛飛六出花  
對雪吟詩清入骨共念溪山放棹人久服元冰不求熱  
更當取雪試烹茶喜弄名駒看汗血時玉田侍  
姬方得子懷人撫  
景意復新處處雲林畫堪割撒鹽飛絮不足誇一片空  
靈機活潑君不見東郭先生行履穿狂歌自得非云拙  
歲暮感憶梅岑

雪中孤櫬冷荒郊此日誰爲采澗毛甕牖素無卒歲計

泉臺豈有祭詩勞世多猿鶴名終假時未龍蛇厄已遭  
梅岑歿怕向青山思往事春風零落舊蓬蒿

春正四日同人集玉田秋葉軒次徹菴韻

風雅張京兆文章漢大夫僑居滄海曲卜宅苧城隅  
許羊求到門無段薛趨聲名遺俗習詩酒洽清娛  
約自新正赴情從舊臘輸尚堪拖雨屐不復戒泥途  
謝客非余拒開軒得共俱書籤存物色花木受涵濡  
寺近疎鐘徹林深衆鳥呼霏微飄雪霰彷彿坐蓬壺  
勝絕憐鷗侶形忘狎釣徒融寒分柏酒入饌借江鱸  
梅冷香猶澁蟾纖魄乍蘇華燈高燭暈綺席畫屏紆  
下榻當投轄飛觴

藉採珠文星光已動墨客興多殊我豈能詩賦君宜  
怪迂阮青纜放眼王白久成鬚雄辨中誠服狂吟調  
不孤今宵多樂事却費步兵廚

次韻答桐邨見寄

老病龍鍾道路難鶯花兩地阻清歡椒盤柏酒情如昨  
桐帽櫻鞵興未闌谷水風烟憑一葦輞川圖畫寄雙丸  
詩筒忽到菰蘆畔君愛交遊憶念寬

曉公留橫雲未歸雨中次韻

曉望雲峯雨外明遙知支遁愛山情浮杯不擾秋灘鷺  
伐木難尋舊樹鶯隔歲園林留夙夢一時陵谷有新聲

丹楓獨護千年壁未許蘇髯攘賦名

九峯草堂

前輩諸公  
乾一建

神龕中峙九峯分堂枕烟霞致不羣一代衣冠規隱逸  
千秋風韻挹機雲齊檐竹飈虛廊色接砌苔侵素壁文  
詩酒消亡賓客盡仙翁遺跡共斜曛

即目感懷

為陳東臯  
寄觀之所

九重泉路信漫漫雲白山青不忍看憶爾心傷經歲久  
向人語及帶風酸兩年薄宦留空橐廿載陰房閉冷棺  
生死論交餘范式獨將老淚灑春寒

集冬青別館得談字

無端情緒似纒蠶儘有奇文取次探不放黃花成獨笑  
更將綠蟻助深談墨痕興逸流文棊雲影秋輕洗蔚藍  
跋扈風騷公等在余今老矣任江潭

秋柳四首次漁洋山人韻

誰向章臺覓斷魂風流曾映舊朱門碧烟消却心無火  
珠露垂來淚有痕點點樓烏明晚照依依離夢冷孤邨  
含情是處逢搖落張緒王恭莫再論  
滿眼丹黃愛著霜獨看顛領倚橫塘舞餘腰態空裙衩  
掃盡眉痕掩鏡箱遙與芙蓉吟楚澤難同蛺蝶畫滕王  
無端種得牽情樹還似當年履道坊



東風搓線織金衣昔日絲絲意盡非少婦樓頭猶彷彿  
先生宅畔想依稀葉迷倦眼從蟬咽萍憶前身悔絮飛  
拂馬藏鴉綠底在長條欲挽已多違  
怯影逢人劇可憐王孫草草共寒烟低垂灞水吟蕭瑟  
飄瞥隋隄望渺綿別調祇餘羌笛恨風情徒老小蠻年  
寄言流涕金城客莫問天涯落木邊

快雪自題夢雨軒見示次韻和之

幽軒獨向小田開幾載閒居重別才今舊關心頻夢雨  
清寒有骨更栽梅但延北嶺千重翠不受西風半點埃  
只恐襄王真欲妬十分香豔此中來

快雪過檢香山詩有述次韻

醉吟深意後人師跌蕩應非老嫗知不幸衰殘當夢得

香山序稱劉夢得詩豪少敢當者却勝傾倒對明之

今垂老復遇夢得非重不幸耶

明之為香死為白老情先合

香山愛義山詩云我死為

山酒友

白書付崑郎計未遲

香山命姪寫詩一料得閉門齋志

在汗青他日有交期

原詩書付兩家新子

弟此中何限是前期

分擬松圓惜別

山窗燈火幾年同飄忽無端逐斷蓬往事鹿盧翻上下

離情風馬自西東祇愁把酒看楊柳但問加餐託雁鴻

不是陽關成疊曲老懷雙泪滴花紅

鳳凰山

嵐翠東雲合何年隱德輝却緣羅網密不必事雄飛

快雪過一椽論詩次韻

相過還許我言詩風雨蕭齋恰正宜擊節未殊歌老驥  
移情何事響哀絲三春吟破鶯花夢一卷心同海岳期  
深淺眉痕應共得但教嗤點不隨時

初過芥舟

限體

竹邊新徑曲通幽階綠簾青恰受秋何處坳堂能著此  
不妨偏認芥爲舟

棟陰深處一孤篷賞月吟風興不窮肯向此中生白髮

解船舟中白髮自前入句

莫教人獨笑張融

菱蘆室偶飲

溪上秋應好言過問道林間情一蕭爽良會若招尋聞  
詠情盈室坐花香滿襟不嫌相就飲同此惜芳心

萼菊摘用淵明詩韻

移舟泛秋江烟邨藹在目顧惟隱遯流子中自登菊緬  
彼芳徑間采采未殘馥東籬復何所緣溪路應熟

秋老枝葉寒刻苦抱晚節金風翻其華爽氣得相徹雨  
露飽所經歌傲成獨絕所以柴桑邨孤松與爲列時聃  
注柔曼頗易霜下傑仙骨遭損多和丹有要訣欲攜佳

友俱翛然忘歲月

歲晏追推移難辭塵俗喧管弦悅綺席蕭寂意自偏泥塗挈貞秀珍重歸秋山蘭橈白沙遠恰與游雲還有如桃李下成蹊不在言

絲殖紛落實黃花獨含英孤根耐後時庶見恬淡情不有真物色百榼徒自傾白雁忘泥爪秋來漫飛鳴相看祇相笑千載共此生

快雪過一椀居索書坡公茶詩用清虛堂韻成長句卽次酬和

從來法書矜錐沙誰當北面居曹衙行閒筋骨各自具

陟釐宛宛明松花綠天庵前池水黑能者不易名其家區區塗抹復何有落紙無緒如老鴉那知野鷺亦蒙愛驅使不律書詞葩髯仙詩筆兩絕妙依稀體製煩羅爬才人風味固同癖一卷搜盡薑鹽茶江東帳下有兒輩便教狂眎成三搗椀庭清晝敞虛白漠然相笑何咨嗟剡藤天闕不復顧學啜茶茗消流霞

留我浦玉田宿

小堂疎雨壓梅風肯放清江返客蓬老去笑談應更切年來酬對幾回同篇章獨領今詩伯田舍終成舊阿翁猶有蒲觴供逸興墨花看映燭花紅

和快雪晨起雪中見示之作次韻

布衾頗覺夜來輕曉起清寒映雪生屋角疎梅纔有色  
樓頭碎玉已無聲剡溪却入移舟興梁苑空懷作賦情  
只是與君堅臥久白頭往恨欲教平

次韻對新柳有感

誰識燕臺詩句好一行楊柳正含情可憐烟態堪吟對  
不覺風流太瘦生

次韻春陰

一片空濛養霧香游絲抱樹怨春陽雨鳩晴燕渾無賴  
黯淡芳華兩自傷

次韻題黃牡丹詩後

彷彿承平一萼黃玉鈞簾捲恨偏長金刀剪處留新影  
腸斷春風綠鬢郎

訪南屏道人次快雪韻

門無嫌徑少駢闐恰稱優游性裏天已信在家能入道  
肯教伏櫪更隨鞭梅花自證多生案柿葉誰供數屋箋  
老去只餘閒主客相看莫問舊烏肩

和雪後過旁老故居

故人通夢正依稀經戶從教望令威卧柳斷橋烟自冷  
短檣殘草燕空飛可憐白髮頻思舊不道清吟更觸機

共對芳時朔遊跡未須聞遂也沾衣

和上巳日疊前韻

祇是深邨客到稀一番節物散清威渡頭雨歇輕舟在  
谷日春晴野雉飛逸少蘭亭空故事廣微曲水嘶閑機  
佳辰正恐難忘世不分芳情嬾振衣

題老媪圖為唯秀作三首

誰矜修婢擅蛾眉遲暮相看倚杖時若道遠山常不改  
自教競起奪胭脂

絕代佳人空谷邊低回舊夢落花前可憐車馬閒閒去

一夜風霜木堦禪

西抹東塗歲漸深也知黃蘗困來心畫中省識雞皮面

桑海因循得至今

次韻午日

古色柴門晝纔遲天吳如馬踐園葵亦知必水清風在  
瀟茗焚香讀楚詞

與玉田南軒話舊

共感浮雲迹相逢未易齊何緣隨蠟屐一笑度花畦竹  
外驚鄰犬桑顛唱午雞還將風雨意長嘯谷陽西

贈竹用前韻

此君立圃中青翠幾竿同裊裊爭含韻娟娟恰受風泥

人看不厭引鳳意無窮知爾凌寒節飄零笑碧桐

和后澗晚歸小山坐月興懷

歸山境已寂坐石月滿林奈何苦寒色同此明迴心淹  
留秋芳樹聊復成清陰

問后澗病四首

吾子高寒士秋還病折磨餐飧常不給藥飧更如何且  
拭牛衣淚聊爲白石歌何人能裹飯風雨到岩阿  
柴桑仁里戶猶得詠飢驅爾自甘寒餓人翻笑拙迂不  
忘溝壑在祇覺性情殊有道維摩詰觀空更底虞  
揮毫還力疾龜勉報知交

后澗病中爲余  
叙蓬累舊稿

致語能通隔

題詞惜繫匏但存撐腹卷應有蓋頭茅誰是肱三折奇  
方手自抄

爲農資八口辛苦望時和君病真無奈吾衰幸似多稍  
分儲益粟莫擬貸監河已作漳濱客風流卧薜蘿

哭二韓二首時以東粵歸卒于廣信道中小春之

九日旅櫬至始得聞信

辛苦成何濟妻孥望眼穿那知書信斷竟作夢魂傳骨  
裏崇山癘囊空遠客錢致貧因致死知爾恨重泉  
去歲秋風裏淒涼抱疾行祇緣家累迫徒有客懷盈筋  
力雖強健風霜實飽更漂零魂魄苦楚些孰爲情

丙申小春曉公有西泠之行招余偕往維時后澗  
以病未與客航恰受兩人行李數程往還十日  
展不出雲林淨寺之間感已深越角吳根而外  
偶焉搖膝爰記遊蹤但諸子于是行各有贈言  
匆匆概不及答茲特錄寄前詩并賦五言短律  
爲引庶幾少存酬和云爾

偶隨飛錫去重與泛西泠老髯惟羞白寒山不改青  
深南北寺吟徧短長亭賸取閒題句慚教靜者聽

我浦南樓坐月

一刻千金夜荒邨草草過登樓情自好看月興逾多隱

樹遙分徑春冰晚渡河應憐歸去急老態欲消磨時子先歸

晚晴

催詩憐小兩對酒愛平川稍斂春陰色仍留晚霽天香  
分居士室花傍孝廉船問子歸能緩吾判共醉眠

西水納涼次韻

炙日尋禪舍臨窗解葛衣松將清蔭席鷗欲靜忘機枕  
簞風偏入菰蒲水四圍自來茅屋趣只有此郊扉  
山中過寶蓮堂訪靈峯禪師  
一見靈公揮塵後碧雲明月幾流連愛遊山澤尋支遁  
善製詩篇儼皎然蠟屐不妨登丈室袈裟可許共湖船

華亭繡水風烟促穩向天寧得勝緣

送曉公之梵受主席二首

山中泉水自來清  
沾灑還須徧福城  
竹杖芒屨持偈發  
汀蘭岸芷寫秋行  
但能明月澄心地  
定少浮雲礙眼睛  
最是草堂幽侶在  
風流老待得歸成  
名藍應卽勝西枝  
顯晦從教在所之  
盞裏香仍分客飴  
室中水自怕人窺  
湖山鄉夢霜禽覺  
風雨吟心雪被知  
倘問郵籤煩致語  
助茶早負菊花期

甲午春正解后初晴于棲麓軒中已閱五年矣每

挹清製竟阻晤言率爾有寄

挹君鄭重畫詩書  
嬾惰空懷履道居  
西社東壇盛名徧  
春鷓秋蟀五年餘  
司空座上親揮麈  
內史邨邊老荷鋤  
歲晚棲遲苦追憶  
未嫌造次託雙魚

曉公過西溪疊元日寄懷韻

浮雲江上未曾消  
幾點飛花帶雨飄  
白鷺烟光春漠漠  
綠楊帆影畫迢迢  
何須野雪偏乘興  
却繫扁舟豈待招  
百里湖山今半載  
誰云相見路非遙

同曉公過范益亭

市囂漸遠接秋涇  
綠水名園隱戶庭  
執拂漫隨杯渡客  
問奇重叩草元亭  
兩年心識應無拒  
片刻談言得未經



塵甑史雲能意氣看余白首眼偏青

晴川自石門回舟果過爽溪旅寓相晤  
上巳

知君石門返過我爽溪隈雖有前時約終為枉道來風  
當上已好花旋牡丹開倘共尋幽駐新詩日可裁

靈公招同益亭靜菴飲牡丹下用澹泞堂看菊韻  
不來清可地誰復對花間妙色迎吟屐芳風拂醉顏得  
依香國裏共坐錦幃間祇覺衰殘質惟教委頓還

過碧光寺

橋李城南泛小航優曇花境靜年芳藜藿遠樹圍青靄  
片片明湖漾碧光愛僻寺連桑柘徑尋幽客到水雲鄉

誰人更問鴛鴦跡千頃烟波正渺茫  
寺在鴛鴦河畔中

鴛河西曰鴛河  
寺僧開悟言之

南軒分咏石首

海上冰鮮至黃金色未渝只言鱗甲好那識枕丁殊頓  
頓思風味新新續筍廚肯將骨鯁化消息問冠冕  
石首冠  
冕首石終  
存不變

聯句和苧原角黍

簪裏長腰米古浦絃歌風雨時后澗招魂空古道古浦

益智豈時宜后澗好並荷炊鼎后澗休勞綵作絲古浦

自教成節物后澗且復療朝飢古浦

過西余塔院

山寺頻吟宿今來竟若何古堂人影絕細路棘叢多廢  
棄憑誰問躋攀且自過雙青遺跡在為爾更摩挲

送后澗寓茭蘆二首

向時蠟屐頻遊處此日禪房假寓初祇有穉男為眷屬  
便教輕槩載圖書夢中十載家緣盡石上三生道氣餘  
攜手入林還一笑真成高枕乃吾廬

歲晚維摩病已疎從今宴坐得如如茶烟颺冷歸禪榻  
花木通幽駐小車客到周旋忘鳳字夢來蹤跡在鴻書  
謂曉公相招將欲至禾中南詢鴛水樓桑下取次茭蘆是故居 終

藝海珠塵

南滙 吳省蘭 泉之輯

上虞 夏琳 崙英校

一樓居詩稿

馮公祝篋

卷下

雨夜有懷后澗

寒雨關心點滴殷詩襟忽感歲闌分十年溪夢同明月  
幾日齋鐘隔凍雲起舞祇教愁越石高眠應自瘦休文  
妙香燈影沉沉裏落葉鳴窗入靜聞

送范益亭之黃巖諭

聞說台州路山行雜水行一官辭故里幾日赴巖程衣  
繞嵐光濕舟連海色晴到時春正好桃李徧巖城  
誰惜萊蕪甌能資司業錢官寒門有雪客到座無羶安  
定規猶在文翁化必傳烏飛應不遠爲問講堂鱣

曉公邀余偕之崇沙我浦以詩相送次韻答之

茫茫絕境欲安之却愧君來話暫離但問木杯浮渡遠  
莫驚皂帽旅行遲春潮浪暖鷗應覺曉霧陰多樹不知  
海外有天惟水氣祇教魂夢得相隨

次韻和培齋春曉

迢遞晨光萬木東一聲喚起曉玲瓏濕紅猶重娟娟露  
煖翠旋和淡淡風霧裏看山懷隱豹雲中寄跡羨歸鴻  
却憐此際清吟者浣手花間思不同

疊韻又和雪虹

三五春星宛在東曉光簾外逗玲瓏桃凝宿雨如啼眼  
柳卧朝烟未颭風林葉茂來喧衆鳥雪泥消盡去孤鴻  
那知更有萼芳侶爭向花晨點筆同

竹上人留食蓴羹

何意來千里蓴絲不待求香應隨鼓化滑恐到匙流偏  
稱伊蒲好憑教上頓休老饕風味在空忝已公留

次韻晚興

水色自明樓樓光晚更幽極天惟去鳥別浦有歸舟烟  
起邨將暝風來座欲秋相看幸無事那用羨閒鷗

雙溪競渡

銀塘雨歇岸明苔擊鼓中流競渡來奮迅欲爭標采處  
攬拏如沒浪花堆吳兒蘭槳矜黃帽越女榴妝豔露臺  
點綴太平行樂事沉淵往跡莫空哀

寄大爲上人卽用舊贈曉公元韻

風流物外得心知清晝才名又一時莫便塵中忘遠客  
已教霞上枉新詩茶瓜幽事堪期待花木禪房有夢思

早晚扁舟乘興好水南雲北更從師

同我浦過靈山次韻與問山上人

偶思閒憩得攀林小語惺忪合賞音冥坐已殊河朔會  
移情真儗海山琴茶瓜留客兼盤淨松竹祛炎接檻陰  
世外近遊多寂寞却教此日滌塵心

寄題桐邨新樓落成

樓成縹緲絕塵氛燕雀高飛賀有羣九點標峯收遠翠  
千家帶郭倚朝曛神仙居自三層畫湖海豪從百尺分  
君向窗間移太華依稀西北盪浮雲

題靜聞以下四世像聞公卽澹泞始祖

卓哉四師從聞公始遞及曾孫作述相繼愾乎如見晉  
時風味或捉麈尾或把如意或輪數珠或執竹筥意各  
有存業亦相濟父子家人一堂四世笑貌音容太和元  
氣肯構肯堂枝柱利慧即澹竹堂房名本本原原永垂勿替  
元宵後一日我浦招集南軒因雨不赴五疊前韻  
却寄

時過元宵未解陰冥濛花霧晝深深懸知話雨筵仍啟  
無那衝泥屐不禁詩細漫教憐晚節情孤偏動惜春心  
誰家愛客能寬酒取次風光一笑尋

同我浦再訪凌邨賞後圃老梅疊前韻

爲訪山翁再討春梅花獨勝在凌邨爭看玉雪鯨鄰圃  
兼過鄰園觀梅祇愛虬龍次水門隔岸借鐘交逸韻水北苑庵甚幽靠  
牆邀竹孕冰痕羨君坐卧芳華畔清夢幽香仔細論

途遇玉田便至芥舟

一笑存傾蓋同攜叩掩扉年來艱苦甚老去向還稀風  
雨情猶戀鶯花事已非幽期須更想衰謝莫相違  
疇昔同舟興飛揚得共依風懷今未減未俗竟安歸夜  
月窺閒夢春流激斷磯極知吟屐徧尚肯問郊扉

商田倡和集錄成寄后澗

畎壑棲遲十五年素心晨夕最堪憐奇文共賞南村宅

對酒忘瘖北渚天瓢笠遊方依繡水鶯花點筆記商田  
欲憑詩卷期千古老去風光藉爾傳

爲陸蘭峯題黃鶴樓圖二首

曾爲楚客問芳洲江上危磯日夜浮落盡梅花春已去  
不知玉遂在樓頭  
一拳槌倒幾時休又向圖中作卧遊欲采芙蓉亂風雨  
爲君添話楚江秋

淺邨以香櫟見惠疊前韻

山園採摘踏幽蹊嘉實應同碩果題磊落霜皮香色正  
筠籠珍重得分攜

次韻和菱邨歲寒雙詠

臘梅

宮額明妝夜不殘鴉兒酒醖共盤桓酒香花氣融詩思  
相狎微吟入歲寒

天竹

火齊垂紅映荔牆天寒翠袖倚風光此君直是天成寶  
訝許勻圓引鳳凰

和借山白蘋花詩

蘋花去雕飾素豔出天然未必輸禪友梔子花謂禪友還宜配  
水仙朝寒晴散馥夕攬翠浮烟白晳風流在非同咒鉢

蓮

復翁同舟送余歸溪

一棹淒迷載雨香  
溯流西去亂斜陽  
烟光帶溼沉遙岫  
雲氣將昏壓小堂

穀日菱邨招飲同谿叟鏡渚我浦

開歲連朝不作陰  
嘉時良會愜招尋  
酒無限量先心醉  
花未全開待客吟  
主人有縱酒但期無限量  
看花須及未全開之句  
輪困薦銀  
嘗索項琅玕持翠  
答知音座中徵問  
邨筒事訓勸都忘  
話未禁

上元前二日復翁招同我浦履菴泊白厓澹園集

釣月疊元日見過韻

朝烟消盡又晴暉  
蔬笋招邀詎忍違  
陶令不辭浮臘味  
杜陵何用典春衣  
香風旋入梅花綻  
絲鬢爭同白雪飛  
醉舞狂吟干物外  
也知道社自無機

時維薄暮晚吾拏舟至舍有見贈一什并以舊稿

示予索題匆匆別去燈下得詩次早奉寄

甚欲存雞黍偏教失對床  
溪舟迴獨夜池草夢西堂  
濟世兼文采方山承當事之指經理  
修築海塘均有專刻為農遇歲傷追隨鴻  
鴈影慚愧不成行

詠金鶴翎菊限香字

松頂爲巢海鶴翔松花新染鶴翎香光含鎖子將軍甲  
影入鵝兒處士觴土色共論三正好檀心獨戀九秋長  
卓然霜下原稱傑欲爲頽齡乞制方

鏡亭以庭梅乍開作詩寄示次韻

巡檐蕭瑟稱衰殘冷蕊疎枝何處看高士有花成玉豔  
清詩如雪帶香寒若爲折贈春難問便得攜吟墨未乾  
夢向羅浮等酒肆幾時取醉一憑闌

鄂方伯奏減蘇松賦額四十五萬兩頌

皇帝踐祚化協唐虞臣鄰密勿風企都俞治益求治勵  
精以圖綢繆補救仁惠覃敷顧茲澤國爲財賦區稅額

偏重獨松與蘇爰稽禹貢厥土惟塗厥田下下江河其  
儲有宋制賦尚薄于儲元時括勘倍屣以殊明仇負固  
稅視私租繼雖酌減難甦鮒魚洎乎晚季更竭徵輸民  
稠勤業不就疎蕪國家肇造無藝悉除按圖因革未究  
根株 仁皇巡狩軫念民痛游多捐貸困猶未舒龍  
飛九五嗣祚之初彌縫繼述波濤有餘東南引領庶其  
及乎待澤兩載漸次規模謂方伯任卽內司徒畀之封  
疆特許陳謨承宣分陝福星涖吳保釐伊始忍峻追呼  
求民之瘼撫籍嗟吁密章入告三奏天樞以劄切故  
聖心躊躕親藩慨議積重難拘 綸音遂沛闔澤須臾



省五十萬以安向隅粟紅貫朽豈惜錙銖四百年來無  
此歡愉如大寒後忽煦陽烏如瀕飢僅得大有書恩膏  
普被浹髓淪膚旣賡拜手功誰歸與倘非補牘何由簡  
孚敢忘曲突僅德焦顛郇伯膏雨不啻隨車山甫清風  
載披穆如明良此日歌滿康衢山永水長九峯五湖金  
湯鞏固帶礪勿渝請看兩郡化日華胥太平萬載願託  
菰蘆茲逢其盛矢此吳歛

寄張太史有懷

可愛風流繞殿姿故應清切歷賓師綸扉撤燭才歸夜  
畫省添香待直時毛義祇深將母念王陽殊有故人思

誰明老衍扃門久西笑長安道我遲

中元日入藩署晤同事諸君

南樓明月北窗風潦倒情懷總未同翠蓋舟中歌自好  
楚如堂上色誰工老無賴處猶彈鋏調適諧時乃爨桐  
最是相逢樂心素白雲日暮共江東

中秋後一日佟方伯招同諸君西泠泛舟

秋光如許愛幽尋恰泛蘭舟散客襟小隊不驚鷗鷺性  
清尊誰趁管弦心水飄荷氣餘殘粉雲送天香弄薄陰  
在眼西泠似相識十年添得鬢霜深

述母德詩

善海珍月  
我母本高裔，怙恃幼俱失。託撫太姨張，提攜如所出。賦質固聰明，內則等慣習。鍼滌與醴醢，循謹不自佚。甫笄歸先人，井臼苦操執。恨無舅姑事，涼涼但琴瑟。誕育弟妹多，不遑寧。食息婢僕鮮，分任中饋肩。獨力辛苦及中年，先人忽遺疾。百計不得愈，鏡鸞慘分翼。同穴心所甘，何忍衆哇泣。勉作未亡人，支撐日不給。兒時未成童，謀生廢文墨。冀保清白聲，負米越鄉國。不成兒不孝，爲餐常并日。豈知兒罪深，弟妹兩不實。熒熒已在疚，子舍又空室。一孫僅三齡，更累移燥濕。欲報劬勞恩，命途偏否塞。彈鋏歌無家，本期甘旨集。艱難涉險阻，歸來仍壁立。

困之安却埽廿載分力稽懷土計已微逢年復難必九  
耕虛三蓄惟悴倚簞笠幸有故人厚念我久困抑吹噓  
溝中斷館穀佐起色菽水歲月長健飭寡啾啾違侍只  
兩旬溢逝永離膝意外遭此變風木嗟何及兒罪誠通  
天椎心銜罔極見星返倚廬成踊哭殞側不克視彌留  
含殮得訊悉母夙皈西方齋心禮繡佛設無床褥困應  
期知病革釋言吉祥逝令終合詩什五福富未臻壽乃  
八十七追維父故時顛沛勢難卒賴母指勸通功濟  
窮阨有兒事遠遊嚙指痛莫卽究無業中裝徒然缺子  
職茹荼五十年奈未符旌律尚方頒帛來煌煌榮服飾

兒未申顯揚曾元或追秩賢節庶可徵聊為述母德

清江移館于少城東偏有池亭幽趣余以汗孫隨

館過而樂之為作長句兼示超倫淑章二子

藤梢橘刺隱池亭魚躍禽飛適性靈不道城隅餘曲室

便移几席聚文星女牆粉帶修廊白畧徇陰通一徑青

雜誦有孫隨負笈小車等到愛幽停

過釣臺

託跡綸竿事不同先生矯矯獨高風客星自老空山裏

狂態猶存湍瀨中雲過祠堂明翠壁潮生霧雨溼青楓

那知千載孤舟客一夜西臺哭魯公

魯公出謝參軍西臺慟哭記

遊柏山寺

黃雲影裏到秋山指點亭臺喜共攀一勺清泉流柏液

千章古木擁禪關栽田博飯僧元朴說餅分香客未頑

是日僧留食餅便趁樵蘇歸也得小舟已待白沙灣

雲塘晚步同湘臯巢雲

聯步尋幽處雲塘細路偏空山無識者野水自涓然原

隰千家望松杉幾隴連有亭堪眺聽徒倚夕陽前

上有翼然亭

謁亭以扇墨見寄却謝

空懷一棹向山陰雪裏翻多遠贈心已訝五雲開素箠

更矜雙墨比烏金奉揚豹采江東去竊近龍香硯北深  
頭白風寒得塵念愧無青玉案詠吟

瀧中望釣臺

瀧中昨夜雨篷底曉來寒不惜征衫薄還爲倚棹看山  
山鳴落澗岸岸嚙迴湍獨對高風下臨衰負釣竿

閩上已

羣鶯啼徧九峯南上已風光月再三酒社荒還尋曲水  
詩腸冷却賸雙柑草生入夢春無幾花到將離贈不堪  
憐取芳時懷客路青山界碧水拖藍

夜泊露筋祠二斷句

一片湖陰結暮雲空隄祠廟記貞芬聚蚊聲裏停舟處  
客夢頻回信露筋

往跡何煩論是非居然像設五銖衣靈旗不捲殘烟霧  
猶伴河干白鳥飛

送程啟生歸金陵

白門秋正好歸及放黃花近局雞堪設鄰家酒易賒腰  
無五斗折囊有百篇誇老我猶蓬累蒼茫憶釣槎  
幕下收才子文雄辟世儒短轅存抱負長揖謝牽拘忽  
漫從交手偏驚是別途風流沾臆處雲樹望能無

題嚴殿衡十琴草堂

嚴子手葺古琴十張各有題識遂名其堂程子  
倡題二律次韻和之

一一龍池貯古春凡緣洗盡總懷新自安瑤軫還清角  
誰向檀槽愛鬱輪冰玉迴排花圃友海山爭會草堂神  
文窗鵲尾相於處長和香風識主人

碧海新圖暎遠岑衆山響徹意悒悒瀑泉柱底塵根絕  
百衲紋中爨跡深長伴幽人成獨往多逢逸士寄清吟  
冰絃七十從君據四壁超然結大音

小春四日出都

浪遊兩載出都門歸去仍愁席未溫迴駕北山移載勒

送君南浦泪添痕滇雲萬里驚衰髻楚水三經斷旅魂  
總爲飢驅老無賴灞陵心事敢重論

小除夕泊四合山

長路隨舟楫悠悠四合山遠烟江浦淨夕照戍樓閒節  
物非殊俗風光亦解顏客情賴天慰臘暖似春還

元日

舟中草草過除夜江上茫茫迨歲朝爆竹聲連大通市  
帆檣影泛秣陵潮生涯老去思芳草消息春來悵柳條  
且拂蒯緱殘客具風烟萬里共飄飄

小孤山二首

錄一首

羸立江心石一拳何人悞作小姑傳自無雲雨行朝暮  
儘有波濤閱歲年山淺未堪藏霧豹天空一任落風鳶  
清清獨得悠然致絕似漁翁老一川

抵師陽署贈陸雲黻

鳥道盤迴幾涉旬蠻烟深處尚餘春花間石徑分城郭  
竹裏琴堂合主賓湖海氣歸樓百尺文章陣掃筆千人  
亦知獨抱滇南勝萬里相看意轉親

周太守以和陸茶溪韻詩見示卽次爲酬

頽年心境未安恬萬里看山側帽簷脈望冀仙殘更蝕  
管城耐老禿猶拈蟻浮拍處添黃輭蜨化遽然擾黑甜

何似使君躑躅隱冷吟閒醉致能兼

涵清軒賞桂

不知金粟地早發小山芳冷露無聲濕秋風自在香子  
從雲外得根寄月中長賸有淮南賦淹留意未忘

次韻鄂少保百色舟中示僚屬詩

臘破巡行日陽回有脚春望光翹粵首食德徧蠻唇旌  
轉江山麗村迎父老親至尊杼脊顧端此藉天人

雲濤寺

螳螂江上好風烟勝絕雲濤此梵天半壁嵌空皆乳竇  
一泓涵碧有溫泉碧玉泉較人從竹徑行如畫客向蕉

窗望卽仙惟有潺湲聲激切翻緣靜裏擾清眠是夜宿寺中

賦得獨秀宵燈制府謀士題

獨秀峯在桂林城內貢院之後旁無培塿坡陀聳然特起如浮屠登其顛俯欄院中纖悉畢見時假為制府行館上元前後許于峯之上下滿張燈彩院內亦然諸僚屬設燕觀賞此粵中僅見之盛事也

獨秀峯高壓暮烟六鼇齊駕繞諸天長春國傍星軺起不夜城瞻斗極懸藻火爭輝排繡闥燭龍銜耀照華筵已將 聖澤開生面百粵風光拱萬年

上鄂制府三首

萬里追從竊濫等那堪老馬更為駒平原意豈輕毛遂商隱心終感令狐沛澤久深無瘴海神威遠越不毛瀘指揮定處生苗格草昧兵農信已孚

雪鬢書生廟末行頻聞天語下褒揚越裳白雉新頷化華岫鳴雲首發祥文武三邊持節重公孤獨坐寫謀長兼

進賢為國誠求切小大從公夾袋光

前身證果是金仙制行渾同法律禪明鏡有臺心獨照菩提無樹相俱圓業敷中外千秋鑑道化西南半壁天早晚功成宏願滿還從帶礪示真銓

次和鄂制府紅優曇花

宛對瞿曇座拈來見夙因  
蘊空仍有色示現豈無神  
品淨心方潔香凝妙絕塵  
塗脂非慶喜須識鬘華身

烏龍潭修祀集

又過烏龍寺裏來風光已到雜花開  
探幽索共遨頭駐惱客還禁婪尾催  
不昧精誠通揭諦相將文物引春臺  
依依桑柘猶扶醉日夕何妨倒載回

竹醉日學仙遊戎來

回軒能整暇勝日喜重過講射薰風淨  
催詩好雨多官中分祭肉野外送秧歌  
萬竹猶霑醉君堪獨醒何

乍從折柳後不覺浴蘭過  
獨寐情偏遠相看興倍多  
遲回靜者意倉卒醉時歌  
不共山窗月其如良會何

南安署中別羽宸采若

遠枝何意聚他鄉風雨南樓共對牀  
今日勸酬明日別只憑春草夢西堂

萬里遨遊羨壯年老思鱸膾著先鞭  
殷勤自有前期在莫負歸乘雪滿船

留別夏東注使君周樂亭太守

衰年猶復事輪蹄三載交情慰旅棲  
豈有盟言在車笠漫叨忘分合雲泥  
秋來鱸膾思偏切歌到驪駒意却迷



歸卧海濱懷遠宦轉教此際重分攜

同人遊近華浦

羣山歷歷繞芳洲柳外波光一片秋是處樓臺皆近渚  
誰家簫鼓在中流幾年遠客驚虛度此日良朋引勝遊  
好景若能攜得去拚將衰鬢更盟鷗

馬龍九日

馬龍客路合重陽迢遞歸程尚望鄉萸菊三年驚鬢老  
桑榆萬里幸身強登山底處從桓景縮地何能問長房  
惟有奮飛心迫促一時險阻避無方

犀牛潭瀑布

潭伏犀牛吼水來平空截出下岩隈玉龍帶沫翻銀漢  
素雨飛濤起蟄雷響入亂山盤結冷流趨衆壑激湍哀  
天台廬阜知何似卽此爭奇耳目開

武陵夜月

月出淨如拭今宵得此晴渚烟連水白漁火近灘明雞  
犬虛秦洞雲帆渺楚程得歸行漸好鳥鵲且休驚

中秋日同我浦履庵啟明過貝多精舍

行脚歸尋故里秋閒閒舊侶得相求名藍久隔懸清夢  
野經初涼稱雅遊採芰漿浮溪葉亂烹茶響和竹風幽  
不愁筋力扶筇晚佛日須貪一再留

振韶在顧邨居并攜和詩見示疊韻奉酬

才拙無能展一籌幾年幕府信伊優歸尋石戶棲安道  
興入溪船到子猷谷水秋田看雨足濠梁畫檻羨魚遊  
何當禮數光衰白江漢從來引細流

農圃安時見不生西疇還課子孫畊康衢歌託青雲客  
郢曲聲披白苧城雨笠烟簑難把臂高山流水自移情  
却慚野外淹裙屐簡畧無煩欲絮羹

並蒂蓮

異種堪矜並蒂傳前身共命化嘉蓮佩遺江漢思仙偶  
名刻茗華記儷緣葭蕕同心爭自喻穠纖合體鎮交輝

紅蕖淥水多輝映別有風流羨比肩

和唐堂落葉

氣蕭園林綠旋雕江邊一路影飄蕭戒寒青女情何刻  
撫樹桓郎泪未消涼月明時堪縱目西風緊處只鳴條  
天涯尚有將歸者臨水登山送沈寥

人日酬我浦見寄

連日多陰此日晴題詩還寄到柴荆梅含臘蕊心猶結  
柳洩春姿眼未明寂寂草堂非舊事蕭蕭蓬鬢任餘生  
東西南北空相憶祇幸衰殘際太平

上元後一日旻齋招同鈍夫諸公雨集敏慎堂

扶筇遠步不辭難巷陌春燈節未殘白髮親知矜燕賞  
清樽主客罄交歡梅花暈碧寒猶勒樺燭燃紅夜欲闌  
最是欄前飛好雨催詩更覺雅懷寬

和送春

臨水登山倍黯然飄零無那自年年東京舊夢迷紅雨  
南浦新愁繞綠烟物理細推須共樂老懷爭盡却相憐  
不堪獨向郊原路水木輕明又一天

京山新闢書軒成再疊前韻

久知衡宇結香茅新拓書軒引翠郊臨水向開溪一曲  
護籬今種竹千梢門前鼓吹徵蛙部庭際松鱗待鶴巢

城市山林兼得致不忻人譽不憎嘲

同戴鈍夫諸人曼華賞桂得香字

多年幽賞未能忘老去還尋世外芳得傍前塵金粟影  
猶聞此際木犀香不羈艷語爭山谷無隱婆心憶晦堂  
今日清樽相伴好獨攀偃蹇惜流光

輓劉鍊師

花溪西畔認丹邱廿載招尋樂燕遊豈意令威終化鶴  
難教尹喜見乘牛烟霞乍散空庭暮花木旋驚老圃秋  
衰邁不堪人境寂茫茫惟對夕陽愁

環溪八景詩

在新安

一水環清

泉水本至清出山流作帶溪亭環綠間悠然見塵外

六峯拱秀

黃山多仙峯左股割其六秀色近可餐晨夕寄游目

馬跡玉泉

相傳為羅隱馬跡水甚白烹茶無色

詩人垂千秋于此託馬跡栖栖非仙流泉自爭玉白

雙松連理

駢柯訝奇松雙根列厓表摩頂枝相糾青青合蘿蔦

南山天馬

迴巒結勝區形勢矜天馬細雨刷風驟夕陽照流楮

北池觀魚

池水卽清淵明鏡開一勺觀者得會心有時見魚躍

玉山夜鐘

山上有玉殿

溪流境已空更愛玉山靜清夜聞鐘鳴幽幽發深省

嶺梅積雪

嶺枝向暖多園芳合如雪誰當萬玉中高卧抱香節

送春次令吾韻

避寒漸展陽和令觸熱遄歸不少留花信頻催三月暮  
風光頓改一時休黃鶯老去聲隨變紅雨殘來影盡收  
相送祇教餘舊恨捲簾吟望怕凝眸

春水

桃花水泛錦江先，漾綠浮紅自滿川。  
淺艸荒灣隨鷺浴，垂楊野岸帶漁船。  
經風欲沒沙邊渡，含雨仍添浦外烟。  
心與春潮爭浩蕩，河橋新漲影連天。

長至

鄉俗傳聞九九歌，昨宵免凍飲亡何。  
晨寒嬾起遲迴久，歲晚驚臨感慨多。  
灰動管吹心轉寂，日長線引髻添皤。  
苦遭毀室人情惡，不得安居守薜蘿。

歲暮有作寄戴鈍夫

貧寒苦乏黃綿襖，却喜三冬日日晴。  
和煦有恩歸北

闕衰殘無慮，荷南榮看孫。但寫宜春帖，謀婦難調。看董  
羹此况向君言，不得歲闌自覺可憐生。丙子病日

有懷六十時視學楚南

萬里懷鉛席未温，楚中文物正堪論。  
琅玕質美多生岳，桃李陰成盡在門。  
須識進賢膺上賞，要將華國報殊恩。  
因思太史周南日，雲夢曾教八九吞。

南極光連紫氣新，紛披湘澤應陽春。  
文星白爾能參化，壽考從來必作人。  
驄馬聲名原博物，絳紗風度本清真。  
穀城莫便尋黃石，黼黻猶當擬致身。

豔陽卉物正芳妍，春滿行臺喜祝延。  
衡岳會神宏壽域

洞庭張樂廣鈞天珠囊潤色新宗匠王貌清癯舊列仙  
此日瞻雲情獨摯輟耕遙頌九如篇

題仇十洲畫冊

小橋跨水隔塵氛茆屋依山隱霧雲猶有避囂人遠訪  
好將風景與平分

南北枝頭已放春山林處處野香新此時多少尋芳者  
盡作羅浮夢裏人

萬丈飛湍落澗遙層層樓閣挹天瓢何緣得覓仙靈境  
劉阮同攜渡石橋

雪後園林分外清卧餘相對自忘情扁舟有客能乘興

來看溪山眼倍明

流水高山有至音悠然神會自攜琴杳冥瀕洞非凡調  
須識成連一片心

飛花送客過春城芳草連天見旅情爭似山村東作起  
水田驅犢一犁輕

題仿松雪畫

白蘋洲外沒鷗波點染湖山噴墨多芳草王孫隨粉繪  
秋風野老帶烟蘿天空雲水漁舟出木落亭臯雁影過  
莫問一時臨仿意含情撫景獨摩挲

汗孫遊庠顧梅宰攜詩見過因留小饌次韻酬荅

冠裳四世羨芳傳窮老慚予一飯先左顧未題門上鳳  
相看只送佛前錢草芥掛客祛塵網粗糲留餐笑甕天  
莫道弱孫皆俊列後昆誰似虎頭賢

贈震園移居

秀塘南畔絕風塵大隱移居卜宅新開徑正資田野趣  
會心偏得畫圖真震園善繪蓼灘鷺宿依垂釣竹院僧來洽  
比鄰老嬾未能隨犢載却忻明哲遠荆榛

題採藥圖

石乳松脂鍊大丹神仙隨境有名山鹿門但見攜家往  
雁蕩空教隔世還跨鯉騎鯨原海外伐毛洗髓在人間

留中柴棘都除盡瑤草琪花滿目斑

我浦云亡晨星盡矣感愴之餘莫任其聲偶緝存

稿趣舉一言以誌絕筆之自

終始交情三十年白頭寥落且相憐嗟來桑戶歸真去

驀對霜風一黯然

歲歲多君寄我詩酬吟不憚數尋思案頭檢徧無來句  
絕筆今年早自知

中秋寄有懷先生

新夏逢君今半秋嘉林咫尺似瀛洲  
時臥樓陰作夢遊

跋附

先大父幼年失怙孤苦伶仃家貧無以供北堂養不得已棄書溷迹市廛爲甘旨計稍長不屑仍篤志力學舉子業而倍肆力於詩旣而飢驅四出周覽名山大川與燕趙齊秦豪俊交遊學益宏詩益富中年嬰疾歸隱莊溪藥鑪茶竈間亦不釋卷凡經史子集百家衆說陰陽星律以及浮屠老子之書皆闡其義鈎其元較訛而詳註焉一時載酒問奇者踵相接也年近邁方伯修公吉圖中丞張公覲臣制府鄂公毅菴後先禮聘相得甚歡經濟詞章咸傾心折服於鄂公幕最



